

# Pekanneutplantasie in Koppies

Heilbron Huis- en Tuinbouklub sou op Woensdag 22 April 2020 Sandra de Jongh se pekanneutplantasie op hul plaas in die Koppies distrik besoek. Weens die inperkingsperiode as gevolg van COVID-19, kon hulle dit nie doen nie en het die lede stemopnames ontvang vanaf Sandra waar sy meer vertel oor hoe die verrigtinge op die plaas verloop. Die opnames is gestuur na die tuinboulede se Whatsapp-groep. Sodoende het die "vergadering" steeds voortgegaan.

Met groot entoesiasme vertel Sandra in 'n neutedop oor pekanneute, waar sy gewoonlik ure lank daarvoor kan gesels. Indien die lede die boord sou besoek, sou elk kon proe aan tuisgebakte pekanneutert, maar ongelukkig moes hulle hulle nou maar verbeel hoe dit proe. Sandra se skoonouers het in 1979 6 bome as geskenk van vriende uit Nelspruit ontvang, wat geplant was agter in die tuin. Nie lank daarna nie het hulle besef dat die bome hier aard en kon hulle stelselmatig die neutte begin oes. Die bome staan steeds en word as massief beskryf. In 1990 is Phillip en Sandra getroud, waar haar skoonpa die neutte as peuselhappies aan die gaste op hul troudag uitgedeel het. Dit is waar die idee begin het om die bome te begin aanplant. Elke jaar koop hulle ongeveer 400-500 bome aan. Die bome is vir die eerste 6 jaar baie rypgevoelig en moet bedek word vir die wintertyd. Sandra vertel dat hulle nuwe bome gewoonlik in September plant en dit is belangrik dat die bome in goed gedreineerde grond geplant moet word, aangesien dit nie kan groei in kleigrond nie. Verder moet die bome baie goed nat gehou word. Op hulle plaas plant hulle die bome 10m uitmekaar in 'n driehoekvorm, wat dan ongeveer aan 'n 100 bome per hektaar plek gee. Wanneer die bome geplant word, moet die grond se pH ten minste 7 wees en die suurversadiging op 0%.

Wat betref die snoei van die bome, moet hulle vir die eerste 6 jaar gesnoei word. Daar moet een sentrale leier wees van die groep mense wanneer die bome gesnoei word, want die bome het 'n klomp sytakke. Dit is belangrik dat die bome reg gesnoei word anders sal hulle nie dra nie. Die meeste neutte word in die lae sytakke gedra. Hulle het in die verlede baie skoolgeld betaal en bome verloor wat nie reg gesnoei was nie. Bome waarvan die takke onder die ent gebreek het, is oor geënt en van die bome het hervat, maar dit was nie 'n sukses nie. Sodoende is al die bome uitgehaal en nuwe bome is geplant. Hulle het groot verliese gelei daardeur. Dit is belangrik om goeie, sterk bome aan te koop. Hulle koop hulle bome aan in die Cullinan area, waar dit gekweek word, teen ongeveer R250 'n boom. Vroeër jare het hulle nie besproeiing gehad nie en was dit 'n droë plantasie. Ongeveer 5 jaar gelede het hulle eers begin

Weens die Koronavirus se kwarantyn-tydperk word almal hartlik uitgenooi om saam te luister na

**HEILBRON HUIS- & TUINBOUKLUB**

se "vergadering" op **WOENSDAG 22 April 2020** om 10:00

op die **TUINBOU** se Whatsapp-groep

Inligting rondom pekanneutbome - Sandra de Jongh -

Korona-groete  
Bly veilig...



besproei, die gevolg was dat die produksie aansienlik verhoog het. 'n Volwasse boom behoort 30kg neutte per seisoen te gee. In die Vaalhartsskema, waar die meeste pekanneute geproduseer word, word die bome besproei met ongeveer 800 liter water per boom per dag, maar in daardie omgewing is dit baie warmer. Hier benodig die bome slegs 300 liter water per week per boom wat eintlik net aanvullend is. Die koste vir die besproeiing is ongeveer R1200 per hektaar. Wanneer die bome geplant is, is dit belangrik om die water, grond en voedingstowwe reg te bestuur. Hulle bome ontvang reg deur die jaar fosfor, kalium, stikstof en sink, wat saam met die beproeiing toegedien word. In die verlede het hulle dit egter net op die bome gespuit. Hulle het dan ook 'n misblaasser ongeveer 7 jaar gelede aangeskaf, wat gebruik word om maandeliks vir die bome blaarvoeding te gee. Dit verseker optimale produksie. Volwasse bome is eers na 8-10 jaar werklik in produksie en wanneer jy beplan om 'n boord te begin, is dit belangrik om die nodige kapitaal in plek te hê, omdat dit 'n langdurige proses is. Sy raai nie iemand aan om skuld te maak hiervoor nie. Na jare se ondervinding is dit vir hulle belangrik om mense die raad te gee om van die begin af reg te begin. Hierdie raad kan tot gevolg hê dat die produksie in 2-3 jaar verdubbel.

Die oestydperk is gewoonlik Junie, Julie en soms ook Augustus – afhangend van hoe die seisoen verloop het. Die oesproses word gedoen met behulp van 'n

skudmasjien wat die boom by die stam skud. Nette word vooraf onder die bome geplaas, die neutte val daarop en word dan per hand opgetel. Hulle huur ongeveer 50 werkers seisoenaal wat die neutte optel en in sakke gooi. Op die einde van elke dag word elke werker se sak geweeg en daarvolgens word hulle per week betaal. Hoe flukser die werker is, hoe meer geld kan hy verdien. Sommiges neem tot soveel as R1500 aan die einde van die week huis toe.

Vroeër jare het hulle die neutte in Jan Kempdorp laat kraak. Op daardie stadium het hulle ongeveer 2-4 ton goeos. Die neutte is dan weer huistoe geneem waar Sandra dit verpak en uit die hand verkoop het. Haar grootste kliënte was bakkers. Soos die produksie verhoog het, het dit onprakties geraak en word die neutte nou in dop aan 'n maatskappy in Jan Kempdorp, met wie hulle 'n kontrak het, gelewer. Hulle kom haal ongeveer 10 ton op 'n slag en verskaf die sakke waarin dit gestoor word.

Op 'n interessante noot vertel Sandra dat Suid-Afrika se geproduseerde neutte meestal



Op die foto bo en onder: Pekanneute bome



uitgevoer word na China waar hulle 'n groot totaal binne 'n week of twee opeet tydens 'n fees wat in Julie gevier word. Vir hulle is dit belangrik om die neut uit die dop uit te eet en kraak dit self. Die Chinese is tans besig om aan hulle eie pekanneutplantasie te werk, om in die toekoms self te kan neutte produseer, maar dit het Sandra egter nie bekommerd nie.

Peste en plaeg onder die pekanneutbome is meestal miere wat die bome opvreet. Miergif word dan net om die stam toegedien. Hulle het gelukkig nog net een keer 'n plaeg van miere gehad.

Willie, Sandra se swaer en buurman, het ongeveer 5 jaar gelede ook met pekanneute begin boer. Hy het die eerste 2-3 seisoene ook 'n probleem ondervind met miere, maar dit is nou opgelos en 2000 bome staan al mooi. Hy baal sojaboonreste wat om die boom se stam geplaas word voor die somer om vog te bewaar, aangesien hy nog nie besproeiing het nie. Dit werk goed omdat hy die bome dan slegs een maal 'n maand met 'n tenk water gee.

Die lede is gegroet met seën, liefde en voorspoed en die jammerte dat hulle nie self die pekanneutplantasie kon besoek nie.

**KORONAKENNIS**

HULPLYN 080 002 9999  
WHATSAPP 060 012 3456

Toon u sekere simptome?  
Streek die hulplyn EERS, daar sal u die nodige inligting verkry!  
Moenie direk na die kliniek of hospitaal gaan voor u nie deur die hulplyn daarheen verwys is nie!